

Botarde kolega sira hotu.

Prazer ida bele mai hamutuk ho ita-boot sira iha seremónia enseramentu virtúál ba ami-nia Programa Mission-Driven Alumni Outreach.

Hanesan ita-boot sira hatene, programa ne'e halao durante semana-rua foka-ba dezvoltimentu lideransa, dezvoltolve proposta, no habilidades halo apresentasaun ideas negósiu ba investidór. Joven alumni nain 30 serbisu ona iha ekipa 10, ho orientadór alumni sira, hodi dezvoltolve no implementa sira-nia projetu sira. Ekipa sira ne'e kompete ba osan \$4,000 hodi finansia sira-nia proposta sira.

Inspiradór tebes hatene katak ita-boot sira hotu ne'ebé partisipa iha programa ida-ne'e, iha ligasaun balun ho Estados Unidos América. Ita-boot sira barak ne'ebé aprende ona lian Inglés liuhusi ami-nia programa Asesu Lian Inglés, sai ona voluntáriu ba UmaAmerika ka nu'udar membrus YSEALI.

Ita-boot sira hotu iha esperansa hodi dezvoltolve ita-boot sira-nia karreira no hetan liután oportunidades ba edukasaun no dezvoltimentu profesionál. No ha'u hatene katak ita-boot sira barak hakarak mellora, lá'os deit ita-boot sira-nia moris maibé mós ita-boot sira-nia nasaun.

Tanba ne'e maka ha'u nia kolega sira halibur ita-boot sira hotu iha programa ida-ne'e. Alumni seniór sira ne'ebé estuda ka hola-parte ona iha programa profesionál sira iha Estados Unidos bele sai hanesan ligasaun exelente.

Sira nu'udar orientadores ne'ebé bele loke odamatan oportunidade nian ba imi barak. Ha'u enkoraja tebes ita-boot sira hotu hodi mantein kontaktu ho imi-nia Orientadór sira no nafatin husu sira-nia orientasaun. Ita hotu presiza modelu-ezemplar atu banati tuir.

Orientadór di'ak no modelu-ezemplar sira bele fó akonsellamentu no orientasaun valiozu ba ita, maibé ne'e deit la too. Ita presiza tuun ba terrenu no halo asaun hodi dezvoltolve habilidade no fiar-an. Ne'e maka parte daruak husi programa ida-ne'e.

Ita-boot sira-nia ekipa ida-idak hamosu ona ideas kreativas ne'ebé sei mellora imi-nia comunidade sira . Ha'u hatene katak júri sira iha difikuldade atu hili programas ne'ebé di'ak liu.

Aliserse husi ita-boot sira-nia ideas projetu hanesan vizaun ida ba futuru di'ak liután ba Timor-Leste. Ambiente saudável, ekonomia vibrante ne'ebé benefisia Timoroan hotu-hotu, no públiku ida ne'ebé edukadu ho di'ak nu'udar parte tomak husi ita-boot sira-nia vizaun ba imi-nia nasaun.

Estadus Unidus Amérika apoia makaas ita-boot sira iha objetivu ida-ne'e. Tanba ne'e mak ami kontribui daudaun osan dólar rihun resin ba ita-boot sira-nia ideas projetu. Ami fiar katak Timor-Leste nia susesu depende ba asaun husi líder foinsae Timoroan sira hanesan ita-boot sira hotu.

Ha'u inspirada tebes tanba servisu hirak ne'ebé imi barak halo ona iha fulan hirak ikus ne'e. Hafoin pandemia COVID-19 propaga husi Xina ba mundu tomak, líder foinsae alumni sira mai iha Embaixada ho ideas kreativas kona-ba oinsá prevene propagasaun moras ne'e iha Timor-Leste. Sira-nia programas benefisia direktamente famílias vulneráveis liu 600 ho informasaun importante kona-ba COVID-19.

Alumni sira hanesan Apolinário dos Santos, Feliciano Aleixo, Angelo Aparicio Menezes, Nuncia Xavier, no sira barak uza ona sira-nia habilidades hodi hola-parte iha batalla hodi prevene propagasaun COVID-19 iha Timor-Leste.

Enkuantu, alumni sira seluk hanesan Silvia de Araújo no Dircia Belo organiza ona semináriu di'ak tebes kona-ba lideransa no edukasaun ba foinsae Timoroan sira , maske iha limitasaun fízika kauza husi COVID-19. Sira ne'e maka eróis loloos no ha'u kongratula ita-boot sira hotu ba imi-nia servisu. Ita-boot sira hotu hanesan ezemplus husi buat di'ak ne'ebé foinsae sira halo daudaun iha Timor-Leste – lahanesan ho imajen ne'ebé dala ruma mosu iha mídia kona-ba joven sira .

Projetu sira ne'ebé ita-boot sira hotu kria ona durante semana hirak ne'e sei kontinua hari'i reziliénsia ba imi-nia comunidade sira . Molok ha'u anunsia ekipas haat ne'ebé sai manan-nain, ha'u hakarak kongratula ita-boot sira hotu ba imi-nia servisu makaas. Diskusaun ne'ebé ita-boot sira halo ona no ligasaun sira ne'ebé ita-boot sira estabelese ona durante programa ida-ne'e, sei lori imi besik liután ba

ita-boot sira-nia vizaun koletivu ba futuru. Kontinua apoia malu nafatin iha jornada ida-ne'e!

No agora mai ita anunsia ekipa sira ne'ebé manan ona...